

ALUR Heart Book

CWINY DHANU



COPYRIGHT
ISBN 1 - 874934 - 17 - 7

E-MAIL: info@angp.co.za

**ALL NATIONS GOSPEL PUBLISHERS
P.O. BOX 2191, PRETORIA, 0001, R.S.A.**

(A Gospel Literature Mission financed by donations)
(Reg. No. 1961/001798/08)

CWINY DHANU

HEKALU PA MUNGU KADI OT PA JOK 1 Yohana 3:4-10

Ni dhanu m'usomo buku maeni:

Maeni en e buku ma kawono ngo. Orone sagu dak aryo kinde m'ewok i ng'om France. Dhanu rubanga dupa ginwang'u mugisa ka gisomo bukune. E calu kyew, kum i iye, dhanu copo neno lembe mi cwinygi calu Mungu beneno. Dhanu dupa ma gineno lembe mi cwinygi ka gisomo buku maeni gituco dubo migi, ginwang'u ruc mi dubo, ku kwo ma nyen.

Kinde m'ibesomo bukune wii kud uwil ya en e kyew m'icopo nenri i iye, in giri. Kadok in i jayic kadi jayic ungo, kadi won nwang'cwiny, ibineno maram ibedo ko calu ma Mungu beneno. Mungu neno dhanu ku yo woko kende ngo ento eneno cil cwiny.

Jok en e weg jundra ceke. En e rwoth mi mudho, jabim mi ng'om maeni. Ceng' moko elokre nidoko calu malaika mi der. Kumeno ebewondo dhanu dupa kum giyenyo ngo ya gipid pi Jok maram kite mandha bedo ko. Niay yang' con, cil kawono bende jukwenda mi ndra gi dupa, gi jutic mir awondi, gilokri gigi calu jukwenda pa Kristo. Ento maeno wang'u i jo ngo! Kum cil Jok de copo lokre gire kara enen calu malaika mi der. 2 Jukorinto 11:13-14. Jok, ma en e jabim mi ng'om, ebeyutho wang' pidoic mi dhanu kara ku ginen mer, dwong', ku tego pa Mungu. Kum kumeno gicopo neno Jawar migi ngo ma en e Rwoth Yesu Kristo. 2 Jukorinto 4:4.

Ju ma fodi giyiyo Yesu Kristo ngo mungu mi ng'om maeni yutho pidoic migi. Gicopo neno ngo ya gibecidho i tho ma rondo ku rondo. Gibimondo i nam mac m'ubewang' ku muganga bende, mac ma bithum ungo. Gin avu i wang' Mungu. Gi jumiru pa mungu mi ng'om. Juefeso 2:1-2.


Tek wang'gi yabre ngo ma gipoy ko ya girwinyo, dong' gibicidho i nyoth mi nja. Ng'atu m'uwacu ya dubo pare mbe ebewondre gire. 1 Yohana 1:8. Kinde m'ibesomo buku maeni man ineno ayi ma ni i iye bende, ecopo poyi pi cwinyi maram ebeto ko. Wek der pa Mungu nyuth lembe m'i cwinyi. Ng'ey dubo peri man kudi iwac nia gi mbe,, kum lembe pa Mungu wacu kumae: "Tek wawacu nia dubo mbe kudwa, nwang'u wabewondra giwa, man lembe mandha mbe i iwa. Ento tek watuco dubo mwa Mungu en e mandha man pwe niweko dubo mwa, nilonyowa de ni gondri ceke. Tek wawacu nia wadubo ngo, nwang'u wadwoko Mungu ni jandra, man lembe pare mbe i iwa." 1 Yohana 1:8-10.

"Rimb Yesu ma Wod Mungu belonyowa ni dubo ceke." 1 Yohana 1:7. Nyo Jok ubebimo wii en dadi ke Mungu? In i jamiru mi dubo kadi pa Mungu? Tek in i jamiru mi dubo kud imung'e ki. Maku ya iywak ba Mungu. Ebedo ayika nigonyi ni kum Yesu Kristo m'ubino i ng'om nibodho judubo. Yesu tho nilaruwa kud i tego mi dubo, Jawar mwa en e Yesu Kristo. Woth peri benen i wang' Rwoth Mungu m'eng'eyo pidoic peri ku tic peri ceke m'upanre lcopo pondo ire ngo, kadi nimung'o tic peri ire de copre ngo. "RWOTH Mungu m'ucwiyo ith, ebiwinjo ngo? En m'etimo wang', ebineno ngo?" Zaburi 94:9. "Wang' RWOTH Mungu ringo kun ku kun i ng'om zo..." 2 Lemkey 16:9. "Wang' Mungu ni wi yo mi dhanu, eneno yo migi ceke. Mudho mbe, kadi tipopiny mi tho de mbe, ka ma jutim dubo copo pondo i iye." Yob 34:21-22; Zaburi 139:1112; Yohana 2:24.

"Mugisa ni ng'atu ma jukabu dubo pare, ni ng'atu ma dubo pare wekre ire. Mugisa ni ng'atu ma RWOTH Mungu pido pi kyer pare ngo, man cwiny mir abombi mbe i iye." Zaburi 32:1-2.

Yesu belwong'o asu, cil tin: "Wubin i bang'a, kewu ceke ma wumulru ku tic, ma ter ma pek unurowu, man abimiyo iwu yom. Wuting' mberembere para i wiwu, wumak ponji de i bang'a. Kum an a mol, cwinya de ng'ic; e wubinwang'u yom i cwinywu, kum mberembere para e yot, ter para de foka foka." Matayo 11:28-30.

1. AYI MIR ACEL



Ng'atu ma fodi ujolo Yesu Kristo ngo maru pare lembe m'i ng'om. Lembe pa Mungu wacu ya ng'atu ma kumeni en e jadubo. Ebedo jaworo mi cik pa tipo ma rac m'ubimo wi lembe mi ng'om. En e ng'eca m'utwire kud ava mi kum. Ereno piny viavia man wang'e de bogre ni kum mer m'emera ko ku kong'o. Maeni en e ayi mandha mi cwiny dhanu ma calu Mungu beneno re. "Tic ma kum mi dubo timo ginyuthri ngbeng' ma gi eni: tarwang', sasa, awanya ma rac, rwo ni mungu m'araga, ajoga, adegi, por, ngiri, kwinyo, ali, pokri, ponji ma tung' tung', kumira, mer ma jumer ko ku kong'o, myel ma rac, ku wagi gin ma kumeno ceke. E kawono apoyowu kendo pi giki maeni cil calu yang' apoyowu, nia ju m'ucikutimo wagi gin maeni gibimondo i ker pa Mungu ngo." Jugalatia 5:19-21.

WINYO MA JAKUHAYA

Winyo maeni ma leng' hay m'usagu, yuke nen ber dit, ku rangi ma cu. Dhanu ceke gifoyo kite ma ber. I cwiny dhanu ecopo nyutho dubo mi kuhaya. Lusifer, malaika pa Mungu, jubole kud i polo ni kum kuhaya, e edoko jadegi pa Mungu. En e wonabali. Nen Isaya 14:9-17; Ezekiel 28:12-19.

Kuhaya ay i ka thuth mi nam mac, man enyuthre ku yo dupa. Dhanu mi ng'om gihayri ni kum lembe ma tung' tung': ni kum lonyo migi, kadi ryeko ma dit ma ginwang'u i somo. Gihayri ni kum kendi mi rukri, ginyutho cil kumgi ma romo ngo junen, giwotho akira tyendgi. Wacopo somo lembe maeni i Isaya 3:18-24.

Jumoko gihayri ni kum the kwarugi, thek migi, kurabedo migi, man ni kum aloci mi tuko. Wigi wil ya "kuhaya lar wok ni nyoth, man cwiny mi ting'ri lar wok ni podho." Lembryeko 16:18. "Mungu gut ni jukuhaya, ento emiyo bero ni ju ma mol." 1 Petro 5:5.

GWOK

Gwok ubenyutho ava mi kum: tarwang' ku gyeri swa. Gwok

umaru ninyothre gire kaka ceke m'ewotho i iye. Dhanu dupa gibedo kumeno. Gimaru dit niribri ku jurimo ma gitimo rac. I nindo ma kawono mi kajik, dhanu gigyeri ku tarwang' dit. Awobi gicopo gwokri ngo niciro ava kumgi, kadok ju ma ginuti ku mon dupa bende. Oro rubanga aryo kadhu yo ng'ey ponji pa Yesu pi kajik mi lembe ceke. Maku wapoy pi lembe pare kum wani i kajik rundi kawono. Dhanu moko mir Afrique, ku dhanu mi thek mange de gilwong'o won tarwang' 'gwok'. Ju ma gitimo tarwang' gibimondo ngo i ker pa Mungu. "Yo woko weg abombi nuti, weg ajoga, weg tarwang', juneg nek, ju ma girwo ni mungu m'araga, man ju ma gimaru ndra." Lembanyutha 22:15. "Wuring tarwang'! Dubo mange ceke ma tek ng'atu moko timo bedo woko i kume, ento ng'atu ma timo tarwang', maeca edubo kum kume gire." 1 Jukorinto 6:18 Nen versi 15-20 bende. "Wung'eyo ngo ya wun wu Hekalu pa Mungu, man Tipo pa Mungu bedo i iwu? Ka kumeno tek ng'atu moko nyotho Hekalu pa Mungu, Mungu binyothe; kum Hekalu pa Mungu e leng', man wun de wu Hekalune." 1 Jukorinto 3:16-17.

KUL

Kul unyutho pi dubo ma jumer ko ku kong'o man pir abamba. En e lim ma leng' ungo, kum ecamu giki ceke m'enwang'u, ekoro ngo gin ma rac ku gin ma ber. Cwiny mi dubo de bedo kumeno, ejolo pidoic ceke, wec ceke ku lembagora kud ayi ma juyiko mir acidi; kura ma rac calu madhu taba, njay, ku giki mange ma nego jo.

Kum ma en e Hekalu pa Mungu nyothre ni kum camu cam ma leng' ungo. Dhanu moko giroyo taba i umgi kadi gikethe i dhoggi, ka gitelo yirone. Maeni en e calu yath ma nego jo, man etelo wi jo i lembe ma rac mange. Madhu taba daru romo dhanu dupa, nwang'u ke ebedo kumeno ngo i nindo ma con. Tego pa Mungu kende copo gonyo dhanu kud i kol mi susu maeni. Dhanu dupa de gimondo i kura mi madhu kong'o: judongo kud aradu, jumaco ku jumamon, jumanyir kud awobi. Kong'one kelo kwond lembe dupa i kumgi, calu ma wasomo i Lemryeko 23:29-30, "Ng'a ma won ang'abacwinyi? Ng'a ma won cani? Ng'a ma won dhaw?"

Ng'a ma won ng'uri? Ng'a ma won lero ma there mbe? Ng'a ma wang'e bogre? En e ju m'ugalu wi kong'o man m'uyenyo kong'o m'ajeba saa ceke." Kong'o en e giracama ngo, en e giramadha ma tho ni iye, ketho Lemryeko 23:31 uwacu kumae: "Awanya kong'o kud unegi kinde m'ebenen ber i wal man kinde m'ebethuthni. Ka jumwonye, e mit, ento macen etong'o calu thwol."

Umadh giparu lembe ngo kinde ma gimer; kong'o loko pidoic migi kara gitim lembe mi kasegu, calu Lemryeko 23:32-33 uwacu: "Weng'i bimaku neno giki ma tung' tung', ng'eyong'ec peri binyothre man yor i cwinyi ibipido pi giki ma kitgi mbe." Som bende Lemryeko 20:1; 6:18-19. Gin acel ma kasegu mi kong'o kelo en e tarwang', Thangambere 19:30-38. 1 Jukorinto 3:16-17 "Wung'eyo ngo ya wun wu Hekalu pa Mungu, man Tipo pa Mungu bedo i iwu? Ka kumeno tek ng'atu moko nyotho Kekalu pa Mungu, Mungu binyothe. Kum Hekalu pa Mungu e leng', man wun de wu Hekalune." Jabamba pire rac i wang' Mungu. Wacamu kara wabed kwo, ento wabedo kwo ngo kara wacam acama kende. Wanego lak kec ka wacamu cam ma ber, ento jabamba ywak kumae: "Mi mage! Mi mange!"

Icik pa Musa, tek ng'atu moko bedo ku nyathin ma jaco, m'ewinjo lembe ngo, m'e jamer kong'o, en e lembe mi junyodo pare niwodhe, nimiye ya jucanye ku kidi cil m'etho ko. Poy mi Cik 21:18-21; Lemryeko 23:22; 28:7. Ju ma ginyobo kong'o ginuti i pokolembe calu dhanu ma gilwore, kadi ju ma gimadhe. Kum Buku pa Mungu wacu kumae: "Can wi ju ma gin andrej kong'o. Gi ryek dit nijebo giramadha ma lake tek." Is. 5:22. "Can wi ng'atu ma miyo giramadha ni judhugola pare m'emedo kwir i iye, cil m'emero ko gi, kara enen muneru migi!" Habakuk 2:15. "Wung'eyo ngo nia weg gondri gibicamu ker pa Mungu ngo? Ku juwondwu! Weg tarwang', ju ma rwo ni ayi gin m'acwiya, ju ma gigyeri swa, weg asara, ju ma timo sasa ku co wagi, jukwo, ju ma ketho cwinygi hay kum piny, ju m'andrej kong'o, jucac, kadok weg kuvuga, gibicamu ker pa Mungu ki ngo." 1 Jukorinto 6:9-10. "Kud wumer ku giramadha ma lake tek ma bimiyo iwu yakni, ento Tipo ma Leng' re m'uromwu." Juefeso 5:18.

Ni ju ma ryew pi negogi Yesu lwong'o kumae: "Tek ng'atu moko ryew pi benege, wek ebin i bang'a emadhi." Yohana 7:37. "Wubin, kewu ceke ma ryew pi negowu, wubin ba pi! Wubin, kubeng'wu ceke ma sente mbe, wung'yew giracama, man wucam." Isaya 55:1. "Ng'atu ma tek bimadhu pi m'abimiyo ire, ryew binege kendo tak de ngo. Kum pi m'abimiyo ire bidoko ni pi mi kwo m'udhenyni, ma bimiyo ire kwo ma rondo ku rondo." Yohana 4:14.

UKUMA

Yedi maeni ma wotho pio ngo, epoyowa pi dubo mi nyap, pi galu, man pir ajoga ma jutimo. Yiyoyic m'umbe en e calu dubo mi timo ajoga. "Janyap tho i awanya pare, kum cinge kwero nitimo tic. Enyotho saa pare nibeketho cwinye hay kum piny, ento won bedopwe miyo ku cwinye ceke." Lemryeko 21:25-26. Ng'atu ma janyap podho i abidhe dit. Tek egalu nijolo lembe mi both, niparu pi kwo pare, ebirwinyo nja ku nja. Nyap twiyowa kara ku warwo, kud wasom Buku pa Mungu ma romo nimiyo iwa kwo ma rondo ku rondo. Ecerowa kud wacidh niwinjo lembe pa Mungu.

Tek wagalu hay kum yiyo Yesu, wamaru rwinyo. Ka Mungu yero iri ya ilok cwinyi ire tin, e piopio jaidhe wok, ewacu iri maku ikoikur tundu. Ewondi ya nindo mange bibedo ber, ceng' mange ku ceng' mucelo, oro ma cen ku oro mange. Ibitundo i ceng' ma tho birubi i iye, ibitho m'iboth ungo, e ibibedo ngo karacelo ku Kristo. Kum kumeno Mungu wacu kumae: "Calu Tipo ma Leng' uwacu kumae: "Tin tek wuwino dwand Mungu, kud wudwok cwinywu nwang' calu i ceng' mi camuco, calu i ceng' mi muloic i yamba." Juebrani 3:7-8.

I Wang' udul ajoga gamu apoka ukuma ni yath ire. Kumeno ukuma benyutho bende dubo mi ketho yiyoyic i yath p'ajoga, ma yiyoyic ma juyiyo ko Mungu mbe. I nindo mi can kadi mi tho dhanu giyenyo nikwero Mungu ma kwo. Giketho yiyoyic migi i kyenzra, i uboko, kadi i yen, i kidi kadi i tung'. Gigeno lembe m'ajoga yero igi pi tho. Eber ya giketh yiyoyic migi yo ba Jacwic man yo ba Jalar migi. Mungu miyo cik ni Juisrael m'uwacu kumae: "Kud iwek dhaku m'ajoga bed kwo." Ay 22:18. "Ng'atu moko m'i kindwu kud umi nyithindho pare ni lam m'awang'a, kadi kud ulam bila. Jakil got, jalam lam, jawodh tho, ajoga, weg tipo, jacwi tho, kadi jayek adranga kud ubed nuti ki i kindwu." Poy mi Cik 18:10-12. "Yo woko weg abombi nuti, weg ajoga, weg tarwang', juneg nek, ju ma girwo ni mungu m'araga, man ju ma gimaru ndra." Lembanyutha 22:15.

"Kud wuribru ku ju ma gikwayu kony ba tipo ju m'utho, kum timo kumeno bicidowu, An a RWOOTH Mungu." Lembe mi Julawi 19:31. "Tek ng'atu moko lokre nikwayu kony ba ju ma girwo ni tipo ju m'utho, abipanu wang'a ire, man abikwane ngo i kind dhanu para. Ka kumeno wugwokru giwu leng' kum An a RWOOTH Mungu mu." Lembe mi Julawi 20:6-7 Som Isaya 8:19-20.

Kinde m'ibesomo buku ma nok maeni, Mungu beyero iri ya maku ilok cwinyi, iwek dubo peri, imi kwo peri zo ni Mungu. Ento tipo ma calu ukuma, ma ni i cwinyi beweco iri yo kumae: "Kudi itim pio, kud imiri tin. Ibitimo kumeno urwo, kadi yenga m'ubino, kadi i oro ma cen. Koilar ipenj nico peri, ilar ipenj dhaku peri, kadi wuru, kadi jarimbi, kadi ju mi ng'om. Maku ipoy tek idoko Jakristo mandha jubiwacu iri ya maku iwek myel ku cokri mi mutoro mi ng'om ceke." Maeni en e dwand Jok! Ento maku ipar pi lonyo m'icopo nwang'u i Kristo Yesu. Kwiyocwiny pare, anyong'a pare ma yere ngo, dwong', kwo ma rondo ku rondo, kud anyong'a kwa. Kan ijolo Yesu Kristo i cwinyi, maeni bikabu lworu pa Jok ku lworu mi tho cen kud i cwinyi. Kristo bino kara egony dhanu ceke ma gibedo ng'eca i nindo mi kwo migi, ni kum lworu mi tho. Juebrania 2:14-15. Tek iwinjo dwand Mungu ngo nwang'u iwinjo dwand wonabali. Tek itimo kumeno ibidwoko cwinyi nwang', ebidoko tek calu apoka ukuma.

NG'U

Ng'u en e yedi ma kwiny m'emaru ninego yedi wagi. Wang' udul adegi, ng'eycwiny, ku kwinyo gibegibimo cwiny dhanu, ketho jumoko gibeginigo wagi de. Ceng' moko ibitwiyo cwinyi ni ng'eycwiny,

ento ceng' mange ng'eycwiny biopo. Emaku ya iyi andha nia ng'eycwiny nuti i cwinyi, man ipenj Yesu nigonyi kud i iye. "Wek kwinyo peri, kud iyi ng'eycwiny unegi, imaru mondo i kyer." Zaburi 37:8.

Kwinyo lake tek man ng'eycwiny de nyayu ndiri, kadong' ng'a ma copo cungo wang' nyeko? Calu ma Lemryeko 27:4 wacu. Dhanu dupa giyenyogijuk ng'eycwiny migi ku giramadha kadi ku culo kwor. Par pi lembe ma Mungu yero: "Judegi migi gidubri swa calu dhanu mi Sodom ku Gomora, gibedo calu tyend ulok ma gicego nying'gi ma kec man mir adra. Giramadha migi en e calu kwir mi thwol." Poy mi Cik 32:32-33. Jumange gimaru nidwoko wang' lembe ma rac ma jutimo i kumgi, ento Mungu biculo kworne. Yesu wacu kumae: "Mar juwedu calu imeri giri." Matayo 22:39. Kendo ewacu kumae: "Mar judegini." Matayo 5:44. Mungu ng'olo nia ebiweko dubo mwa, tek wan bende waweko dubo mi ju ma gitimowa rac. Ng'atu m'ukanu lembe mar rac i cwinye ku ng'atu ma ng'ur yor i cwinye, gitimo gin ma judagu i wang' RWOTH Mungu. Pidoic ma rac cwalu jo nikyedo lwiny man nicwiro rimo. Ka kumeno eromo ya kwiyocwiny pa Mungu ma bijik ungo cil nja ubim cwiny dhanu.

THWOL

Thwol uwondo Eva i podho mir Eden. Enyotho ribri ma ber ma gibedo ko ku Mungu. Jok, malaika m'upodho, ubedo ku nyeko i kum Adamu ku Eva kinde m'enenyo ya RWOTH Mungu kethogi ni jubim wi ng'om. Gibedo ku ribri ma ber ku Mungu, calu en elar ebeto kudo con. Ni kum nyekone Jok uyenyo enyothgi, man andha enyotho ribri migi ku Mungu. Nyeko maeno ma rac ku kumira i cwiny dhanu bedukabu mutoro mi jumoko ka gineno jumange ma gibedo kud anyong'a man ku kwiyocwiny. "Nyeko mbe ku kisa calu lyel." Wer pa Salomon 8:6. Nyeko ketho pidoic ma rac dit i cwiny dhanu kara ukab mutoro mi jumange, man eketho jumoko nego wagi ngi. Maeni de bedutimre i kind nico ku dhaku; i kind jukuloka man i kind bedo ceke mi dhanu. Enyayu can dit apila kud adegi. Kadok Jukristo ma gitimo tic pa Mungu, kadi jukwac ku juponji, nyeko wekogi ngo. Emaku ya gikuri matek kum mer pa Mungu konjre haw i cwinygi ni kum Tipo ma Leng' m'umire igi calu ma wasomo i Jurumi 5:5. Kumeno nyeko bitimogi ngo ka gineno ya Mungu timo tic dit ku jutic wagi.

UNGWAL

Ungwal camu susu m'i ng'om. Maeni bepoyowa pi dubo mi ngiri man mer ma jumaru ko sente, ma en e ulag kwond dubo ceke. 1 Timoteo 6:10. Kit ungwal moko nuti i Congo ma gicamu ukoko dupa. Giyeng' cil ma igi yenyo ng'eny ko. Jangiri yenyo ngo nikonyo dhanu kadi nimiyo gin moko ni jucan. Eponjo ku yo ceke ya ecok lonyo m'i ng'om, ku yo ma pwe kadi ku yo m'ugondre, ento munyali bicame man ebitop. Ni kum lembe maeni Yesu wacu iwa kumae: "Kud wukan lonyo mu i ng'om keni, ka m'ukoko ku munyali ginyotho piny i iye, man jukwo bende gituro nikwalu. Ento wukan lonyo mu i polo, ka m'ukoko ku munyali ginyotho piny i iye ngo, man jukwo bende gituro ngo nikwalu. Kum ka ma lonyo peri ni i iye, cwinyi bende ni kuca." Matayo 6:19-21. Akan ku juot pare githo ni kum awanya mi mola ma kwar ku mola ma tar, ku kanzu ma ber. Yocuwa 7 Yuda Iskariote ma jalub Yesu, edeyre kum mer mi sente ketho ecibo Yesu. Matayo 27:3-5. En e sente ngo ma pire rac, kadi mola ma kwar de ngo ento mer mi sente m'upondo i cwiny dhanu re ma e rac.

Udul co ku mon mi thek ceke gibenyotho lembe migi ku lembe mi juudigi, ni kum ava ma rac mi nwang'u lono piopio ku yo ma tung'tung' ma kakare ngo. Jumoko doko jukwo ku juneg nek ni kum awanya ma rac mi lonyo. Wang' udul mer ma jumaru ko lonyo, ku ngiri mi sente ketho dhanu gisendo jucan piny. Kadi bodho mi yiko ramlembe mi tic bedo le i cwiny dhanu moko nisagu pido pi Mungu, ketho gicayu juyic ma gilubo ponji pa Kristo cu man gikwero ribri kugi i cokri migi. Yesu wacu kumae: "Wugwokru, man wukuru giwu ya kud wuketh cwinywu hay kum piny, kum wo ma dhe pa dhanu mbe i piny dupa m'ebeto ko, kadok ebe da jalonyo m'usagu ceke." Luka 12:15. Wuwinj lembabola pi jalonyo ma jakasegu: "Jalonyo moko yang' ubedo ku podho m'ucego ire cam dit. Ecaku niparu lembe yor i cwinye kumae: <Abitimo ang'o? Kum ambe ku kaka m'umaku agwok cam para ceke i iye.> "Elund ewacu yor i cwinye kumae: <Abimugo dero para ceke man abigoyo mange ma dongo ma sagu,

abiketho cam ku piny para mange ceke kakeca. Kadong' abiwacu yor i cwinya kumae: Inuti ku piny ma beco dupa ma bikonyi oro dupa. Yom, cam, madhi, man anyong'a negi.> "Ento Mungu wacu ire kumae: <In i jakasegu! I dyewor maeni abigamu kwo peri; ka kumeno gin maeno ceke m'icoko, gibidong' ni ng'a?> Ebibedo kumeno ni ng'atu m'ucoko lonyo ire gire, ento yo ba RWOOTH Mungu ke lonyo pare mbe." Luka 12:16-21. "Kuloka ang'o ni dhanu kadok egam ng'om ngung', ma kwo pare ke rwinyo?" Marko 8:36 Som Luka 12:22-34 bende.

NYING WANG'

Mungu neno giki ceke ma nuti i cwiny dhanu. Lembe acel de mbe ma copo panre ire. Kum kumeno eng'eyo pidoic ceke m'upanre, ku lembapora ceke mi cwiny dhanu.

CERO MA DER PARE MBE

Cero benyutho pidoic ma nuti i cwiny dhanu ceke. I ayi maeni e col, ebenyutho dubo ma ng'atuni bedutimo akakaka. En e abinga, ekyer kud i lemandha ketho poko i kind gin ma ber ku gin ma rac copo loye. Nindo moko pidoic ma rac ma kumeno bedo yo, nindo moko ke ebedo kud adyeng'acwiny. Ka ng'atu moko timo rac pidoic ma rac wacu: "Cwinyi kud udyeng';" ento kan etimo ber kaka nifoye ecaye acaya. Ebedo ve junyelo pidoic pare ku nyunyu ma lyeth. Lembe pa Mungu benyutho iwa maram maku jadubo bin ko ba Mungu kara pidoic ma rac ma kumemo bed umbe. Wapid maram wacopo konyra ko, ng'atuman ukony wadi nibedo ku mer nitimo tic ma ber. Juebrania 10:24.

JOK

Jok en e weg dhanu ceke ma gicwayu ndra, ma gitimo ndra de. En e jacak dubo ma tung' tung', man en e ubimo mi cwiny. Yesu wacu kumae: "Wegwu en e wonabali, man wuyenyo nitimo giki ma wegwune yenyo. Ugamre kukwong'a ebedo janek, ecopo timo ku lemandha ngo, kum lembe mandha mbe i iye. Tek ebecwayu ndra, ebeweco calu kura pare, kum en e jandra man en e wego mi ndra. Yohana 8:44. Dhanu moko gipido nia ndra ma nok ku ndra ma dit nuti. Kadi ya ndra moko tar kum ecopo bodho dhanu, moko col kum ekelo lembe ma rac. I Lembe pa Mungu tung' tung' mbe, ceke ndra kwa i wang' Mungu. Ndra moko juyero, moko jugoro, moko jutimo. Won ambili wondo dhanu nia en e kit dhanu ma ber, ento en e andha ngo. Mungu copo cwayu ndra ngo, Tito 1:2. "Tek wawacu nia wabedo ku ripocwiny wakude, enke wabewotho i mudho, nwang'u wacwayu ndra, man watimo lemandha ngo." 1 Yohana 1:6. "Yo woko weg abombi nuti, weg ajoga, weg tarwang', juneg nek, ju ma girwo ni mungu m'araga, man ju ma gimaru ndra." Lembanyutha 22:15.

LEB MAC

Mac m'ubewang' ubepoyowa pi mer pa Mungu ma kwiyo ngo ni kum gin ma rac i cwiny jadubo. Kadok Mungu dagu dubo, emaru dhanu. Eyenyo ngo ya jadubo rwiny, ento eyenyo ya elok cwinye kara enwang' kwo. Yesu bino kara elar judubo. Anyong'a ma dwong' nuti i polo tek ng'atu acel uloko cwinye. Yesu Kristo en e "Nyathi Rombo pa Mungu ma kabu dubo mi ng'om woko." Yohana 1:29.

LEMBE PA MUNGU


I Lembe pare Mungu beyero ni judubo ceke ma juwondogi, ya maku gilok cwinygi kara der ku mer pa Mungu mond i igi. Both umbe ku yo mange, ndhu niwinjo man niworo lembe ma nuti i Buku maeni ma en e Biblia.

AKURU

I ayi maeni akuru benyutho ayi Tipo ma Leng'. Tipo mi lemandha bepoyo cwiny dhanu pi dubo, pi bedopwe, man pi pokolembe ma bibino. Tipo ma Leng' ubedo ceng'ni ku cwiny, ku yo woko. Ecopo bedo ngo i cwiny ma dubo bimo.

Tek cwinyi bedo calu ayi cwiny maeni, maku ya iywak ba Rwoth Yesu, ilok cwinyi ire, kara der mi lembe pare car cwinyi. "Yi Rwoth Yesu e ibiboth." Tic mi Jukwenda 16:31. Mungu yenyo eketh lembang'ola pare timre kakare i cwinyi. Eng'olo ya ebimiyo iri cwiny ma nyen, man ebiketho tipo ma nyen yor i ii. Junyutho ponji maeni i ayi mir aryo ma wabiparu pire kawono.

2. AYI MIR ARYO



Ng'atu m'uloko cwinye niyenyo Mungu doko tung' dit. Lembe pa Mungu bedo calu palamularu m'ucobo cwiny jadubo. "Kum Lembe pa Mungu e kwo, e tek, e bith ma sagu palamularu ma lake kun ku kun. Ecobo ng'eyong'ec ku tipo, man ujonj ku miyo mi cogo bende. Epoko lembe wi pidoic ku lembapora mi cwiny." Juebrania 4:12. Lembe pa Mungu wacu ya "Sukuliya mi dubo en e tho." Jurumi 6:23. "Ekethre ni dhanu ceke ya githo wang' acel pil, man yo ng'ey maeni pokolembe pa Mungu." Juebrania 9:27. Kaka mi dhanu ma gi juyic ungo ni i nam mac ma wang' ku muganga.

Upokowic ubepoyo jadubo nia kawa ceke wabikotho be. Wamaru kumwa maeni dit, wamiyo ire cam, waronye ku kendi, man waruke. Wabetimo lembe ceke nipong'o yeny mi kum. Kum nini bitho, ebitop, e ukoko bicame. Ento ceng' moko kwo mi dhanu bicungo i wang' komker mi pokolembe pa Mungu. Jaduho maku bepoy pi lembe pa Mungu man nipido pi mer pa Rwoth Yesu Kristo. Tipo ma Leng' umaku niryeny i cwinye ma dubo lar uyutho. Der pa Mungu bemondo i cwinye, emaku beryemo mudho woko. Kinde ma der umondo mudho befringo. Yedi m'ubenyutho kwond dubo ma tung' tung', giberingo.

Ka kumeno in i ng'atu m'ibesomo buku maeni, dong'iwek Yesu, ma en e der mi ng'om umond i cwinyi. Tek itimo kumeno mudho ku tic mi mudho biwok woko kud i cwinyi. Yesu wacu kumae: "An a der mi ng'om." Yohana 8:12. Icopo wodho mudho ki ngo kud i cwinyi ku tego peri giri, kadi ku ryeko mi dhanu. Yoje acel kende, en e yo m'atira, ma yot, mandha de, ndhu niweko der umond i cwinyi, e mudho ma en e dubo biay woko. Mungu m'uwacu kumae: "Maku der uryeny i mudho," en e en m'uketho der pare ryeny i cwinywa. Kara emi iwa der mi ng'eyong'ec mi dwong' pare m'uberyeny i wang' Kristo." 2 Jukorinto 4:6. Dwi ku cero copo konyowa i dyewor ma col bi, ento ka ceng' uwok, piny ma colne ku nyithi derne birwinyo. Yesu en e ceng' mi Bedopwe. Kinde ma Yesu mondo i Hekalu i Yerusalem, eryemo dhanu ceke m'ubeloko koni dhyang', rombe, kud akuru, man eoyo sente. Ewacu kumae: "Jubilwong'o ot para ot mi rwo; ento wubedwoke ni kagonjo mi jukwo." Matayo 21:13. Mungu yenyo ya cwiny jayic ubed ot pare. Eyenyo ebed i iye, kara eyunge, erom iye ku der, ku mer man kud anyong'a. Yesu bino pi weko dubo mwa kende ngo, ento kara egonywa kud i kol mi dubo. "Tek Wod Mungu ma Yesu bigonyowu, wubibedo agonya andha." Yohana 8:36.

3. AYI MIR ADEK



Anyong'a benego ng'atu m'uloko cwinye andhandha. Eng'eyo nia Yesu tho pi dubo pare ceke kor yen m'athara. Kinde m'ebeneno yen m'athara ma Lembe pa Mungu benyutho ire, cwinye m'udyeng' utur. Can unege kum elar ekwero Rwoth Yesu Kristo. Kan eneno mer ku dwong' pa Mungu m'unyuthre i Yesu Kristo, mer maeni mondo i cwinye. Emaku ninyang' ndhu nia Yesu ma en e Wod Mungu, ubino nikabu dubo ceke cen. Yesu yiyo nitho kakare kor yen m'athara.

Cwiny ku bedo pa jadubo m'ujolo Yesu doko tung' ma gwey kum epoy ng'eyo ya Yesu sendre dit pire. Jufodo Yesu, juroyo jamker mi wic mir ukudho i wiye. Jugure ku musumali kor yen m'athara, ndhu pi dubo mwa. Kinde m'ebesomo m'ebenyang' de i lembe pa Mungu, ebenenre en gire i kyew pa Mungu. Emaku ng'eyo andha nia cwinye bedo bor ku Mungu man eturo cik pare. Mer ku kwiyocwiny pa Mungu mondo i cwinye kan emaku poy andha nia "Rimb Yesu ma Wode belonyowa ni dubo ceke." 1 Yohana 1:7. "RWOTH Mungu ni ceng'ni ju ma cwinygi tur, ebodho ju ma gijwigri, ma cwinygi dyeng' kum dubo migi." Zaburi 34:18. Tipo ma Leng' ubetuco ire lembe ma Yesu yero: "Woda, cwinyi bed tek. Dubo peri

wekre.” Matayo 9:2. Kinde m’eneno ba yen m’athara, man ba rimb Yesu m’ucwir kuca, eyiyo nia Yesu tho pire. Emaku ng’eyo ya ter mi dubo pare kabre woko kum Yesu yeye kan etho. Yesu yeyo can mwa: “Jutong’o lero i kume pi gondri mwa, junyayu rem i kume kum kyer mwa, man RWOTH Mungu ketho kyer mwa ceke i wiye.” Isaya 53:5-6.

Kawono der pa Tipo ma Leng’ ubecaru cwinye ceke. Con iye bedo col man cilo romo iye de. Ento kawono elony, edoko tar calu pey ni kum rimb Yesu. “Kadok dubo mu bedo kwar ngbo, gibibedo tar calu pey; kadok gi kwar calu rimo gibibedo tar calu yuk rombe.” (Isaya 1:18. “Tipo pa Mungu ribre ku tipo mwa man enyutho ngbeng’ nia wa nyithindho pa Mungu.” Jurumi 8:16. Som Yohana 3:16 man 1 Jukorinto 6:11 bende. “Waboth ni kum tho pa Kristo, man dubo mwa wekre woko. Kumeno Mungu nyutho iwa lonyo mi bero pare.” Juefeso 1:7. Kawono awanya mi kum ubedo ku kaka ngo i cwiny dhanu ma ayi Mungu ni i kume. A va timo ni Mungu sagu, kum Mungu lar umaruwa. Con jadubo maru ng’om ku giki ceke ma ni i iye, ento kawono emaru Mungu ku lembe ceke ma pa Mungu.

Yedi ma gibedo i cwiny jadubo, gini yo woko ku cwiny ng’atu ma won bedopwe. Ento Jok uyenyong’o ewoki, man ebeneno ng’eye kara tek copre emond i iye kendo. Pi lembe nini Rwoth Yesu cimowa ya dong’ wakur ku rwo bende, wagut ni wonabali, e ebiringowa. Yakobo 4:7.

4. AYI MIR ANG’WEN



Jakristo m’udaru nwang’u kwiyocwiny mandha, ku war bende ni kum lam pa Rwoth ma Jalar mwa Yesu Kristo, eromo ngo ya elulre. “Pira gira re gin mange mbe m’alulra pire, ndhu pi yen m’athara pa Rwoth mwa Yesu Kristo. Ni kum yen m’athara pare, awanya mi ng’om uthum ira, abedo calu ng’atu m’utho ni awanya mi ng’om.” Jugalattia 6:14. Rwoth uyeyo dubo mwa i kume kor yen m’athara, kara wan, ma watho ni dubo, wabed kwo ni bedopwe. Wacangu ni kum goc pare.” 1 Petro 2:24. Waboth ku Tipo pa Mungu e wabi-voyo awanya mi kum ni kum tego pa Mungu yor i cwinywa. Tek wabedo kwo ni kum Tipo pa Mungu, maku wawoth i Tipo pa Mungu. Jugalattia 5:16,25.

I ayi mi cwiny maeni waneno yen m’athara ma juguro Yesu i kore, ka gidaru wodho kendi pare. Waneno del ma gigoyo ko Yesu umbe kisa, kum “ponji mi kwiyocwiny mwa ni i wiye. Enwang’u goc kum dubo mwa.” Is. 53:5. Ubimo ma Herode ku jupare ging’ero Yesu. Yo ng’ey goc ma gigoye ko ku del, gironye ku kendi mange ma kwar ngbo. Kaka niroyo jamker mi wic mi dwong’ gikyedo jamker mi wic mir

ukudho, giroyo i wiye. Kaka uluth mi ker giketho undodi i cinge ma yor acwic. Girumo cong'gi i wang'e ma gicaye ko, giwacu kumae: "Moth iri Ubimo mi Juyudea!" Ging'ulo law i wang'e giting'o undodi gigoyo ko wiye. E kinde ma gidaru caye gitere woko kara gigure kor yen m'athara.

Ju ma gilwong'ri mananu ya gi Jukristo gi dupa ma girwo i ot pa Mungu, gicidho dhu cemo pa Rwoth, giwero wer pa Mungu, ento tic ma rac migi ubeguro Rwoth kendo kor yen m'athara. "Ku ba dhanu ceke ma gilwong'a 'Rwoth, Rwoth" gibimondo ngo i ker mi polo, ento ng'atu ma betimo yeny ma i Vwa ma ni i polo yenyo re." Matayo 7:21 Koisom versi 22-27 bende. layai maeni waneno bende usau sente pa Yuda m'ucibo Yesu; jumiyo ire mola ma tar pyer adek. Mer m'amaru ko mola ma tar udwoko ng'eyong'ec pare abinga, enyotho cwinye. Askari ma gimaku Yesu gibino ku dyewor ku jamlwiny ma tung' tung'. Tok cen gigoyo kendi pare i gagi, ketho lembe pa Mungu timre kakare m'uwacu kumae: "Gipoko kendi para i kindgi, gigoyo bongu para i gagi." Zaburi 22:18.

Gimayu piny pa Yesu ceke, ento giyiyo ngo ebim wigi. Dhanu dupa gibedo kud ava nijolo mugisa m'uay ba RWOTH Mungu, cil koth de, ento giyenyo ngo gibed wor ni Mungu kara ebim wigi. Jumange gipoy pi Mungu i nindo mi can ku masendi kende.

Askari gicobo ng'et Yesu ku tong'. "E ndhundhu nica rimo ku pi thwogre." Yohana 19:34. Ka fodi kulok ukok ungo Petro kwero Yesu wang' adek, ento yo ku ng'eye eloko cwinye ku ywak ma dit apila. Matayo 26:75. Iberweyo lembe pa Yesu ku dhogi man ku tic peri bende? Kadi nyo ibedo ku lewic nituce i wang' dhanu? Yesu wacu kumae: "Tek ng'atu moko bituco i wang' dhanu ya en e jalubna, an bende abituce i wang' Vwa ma ni i polo. Ento ng'atu ma tek bikwera i wang' dhanu, an bende abikwere i wang' Vwa ma ni i polo." Matayo 10:32-33.

Yesu wacu kendo kumae: "Ng'atu ma tek uting'o yen m'athara pare ngo niluba, en de eromo ngo nibedo jalubna." Matayo 10:38. Mugisa ni ju ma gicungo wi cana ma en e Yesu Kristo.

Wer 71:

Cana mwa ma tek mi nja ma jung'enyoy pira dra, Rimoni ma yang'ucwir, ecwir haw pi dhanu kpo. Rimbe ruco dubona, man edwoka leng' ma njwa.


Malaika maku gin ma copo nyutho nying tic, ma kwo ma nyen pa jayic bicego. Nen ayi mir abic.

5. AYI MIR ABIC

I ayi maeni waneno jadubo m'udaru nwang'u lwok ku dwokri leng'. Jadubo m'unwang'u both ni kum bero ku kisa ma dwong' pa Mungu. Cwiny maeni bedo ni Hekalu pa Mungu andhandha, ka ma Mungu ma Wego bedo i iye, ku Wod man Tipo ma Leng'. Calu Yesu ng'olo: "Tek ng'atu moko mara, ebiworo lembe para." Yohana 14:23. Mungu miyo yung ku mugisa man "Eting'o dhanu ma kitgi mbe malu." Luka 1:52.

Kawono cwiny maeni en e Hekalu pa Mungu. Dubo mbe i iye kendo. Udul yedi mbe, jabim migi bende ma wonabali man won ndra, ceke mbe. Ento waneno Tipo ma Leng', ma en e Tipo mi lemandha bedo en. Nwang'u cwinye bedo ni kabedo mi tic ma rac mi kum, ento elokre calu podho ma ber ma cego cam ber. Yenne bende cego nyinge calu cwiny ng'atu ma pwe m'ebecego nying' Tipo: "Mer, mutoro, kwiyocwiny, mwonyolemb hay, bedo ber ku dhanu, berocwiny, bedomandha, molcwiny, ku kwerigijo." Jugalatia 5:22-23. Ecego nying' mange ma ber ni Mungu ku ni dhanu bende. Edaru doko jang ulok mandha ma cego nyinge, kum tyend ulokne en e Rwoth Yesu Kristo. En e ng'atu ma cego nyinge kum ebedo i Yesu Kristo. Kristo ku lembe pare de bedo i iye. Yohana 15:1-10. Kum emaku babutisi pa Tipo ma Leng', Tipo pa Mungu rome. Ebedo ku tego mi voyo kum, kud awanyane man niguro ng'atu ma con kor yen m'athara, kara kud edok kendo i lembe mi ng'om. Ebii niwotho ku tego pa Tipo pa Mungu. Ekwero niwotho kendo i lembe m'ebeneno, m'ebewinjo, kadi m'ebepido pire. Ewotho ku ziyoyic, kum

iyoyic i Yesu en e “aloci m’uloyo ng’om.” 1 Yohana 5:4. Ebedo ku genogen mandha man ecungo tek kum egeno nia dwogo pa Rwoth Yesu Kristo ni ceng’ni. Ebedo i mer pa Mungu ma bedo mi nja.



“Mugisa ni ju ma cwinygi leng’ kum gibineno Mungu.” Matayo 5:8. Ubimo Daudi, kadok ebedo ku lonyo dit, evoyo judegi pare ceke de, eng’eyo ya lwiny ma dit m’usagu ni yor i cwinye. Eng’eyo nia cwinye yenyo kony yo ba Mungu ketho erwo kumae: “E RWOth Mungu keth cwinya bed leng’, man iketh cwiny ma nyen i iya.” Zaburi 51:10. Ng’atu moko mbe ma copo dwoko cwinye leng’ en gire. En e lembe pare nibino ba Mungu ku cwinye m’utur calu Daudi timo. Ekwayu Mungu ya eketh cwiny ma nyen i iye. Mungu bedo kud ava nitimo gin ma nyeni i beng’i. Niyiyo ku dhogi kende ya ilokri nidoko dhanu ma ber uromo ngo tek yor i cwinyi ilokri mandha ngo. Maeni copo dwoko cwinyi ngo ni kabedo pa Mungu. Mungu wacu kumae: “Abikiro pi ma leng’ i wiwu, wubidoko leng’. Abidwokowu leng’ ni cilo ceke man ni mungu mu m’araga. Abimiyo iwu cwiny ma nyen, abiketho tipo ma nyen i iwu. Abikabu kud i kumwu cwiny m’umbe ng’eyong’ec, m’ubedo calu kidi. Abimiyo iwu cwiny ma yom ma jolo lembe. Abiketho Tipo para i iwu, wubibedo juworo ira, wubitimo lembang’ola para.” Ezekiel 36:25-27. Maeni en e thelembe mi lembariba ma nyen ma Mungu timo ku rimb Yesu Kristo ma Wode.

Ayi malaika nuti bende i ayi maeni. Jumalaika gi jutim ni ju ma gibinwang’u kwo ma rondo ku rondo, gityeko ju ma gilworo Mungu. Zaburi 91:11; Daniel 6:22.

Wonabali bende benen i ayi maeni. Ecungo ceng’ni cwiny. Ebeyenyo yo m’emond ko i kaka ma yang’ ebedo i iye. Pi lembe nini Mungu wacu ya maku “Wubed nger, wuki de! Jakwojwu ma wonabali ubewo tho kun ku kun calu umvor m’uberundo, m’ebeyenyo ko ka ng’atu m’ecam.” 1 Petro 5:8. Wang’ udul Jok lokre kara enen calu malaika mi der, m’ewondo juyic ma gikuri ngo ni awanya mi ng’om. Tek copre, ewingo ju ma Mungu koyogi pi both. Ento (wagut ni wonabali man ebiringowa.) Yakobo 4:7.

6. AYI MIR ABUSYEL



Ng'atu m'uweko yo pa Mungu, anyong'a pare lokre ni can. Wang'e acel umaku beumre; ebedoko polpol, nindo betime. Wang'e m'ucelo beneno ng'ete kun ku kun ma lewic umbe, kum awanya mi mutoro mi ng'omubepeye. Der ma yor i cwinye ubedoko viavia. Kabedo pa Tipo pa Mungu mbe kendo. Maeni benyutho nia eyenyo kendo ngo nisendre karacelo ku Kristo. Ebedo i kind abidhe dupa, man emaku nimondo i igi, ecere gire ngo. Kaka niwinjo dwand Mungu ewinjo dwand jbidhe ku lembang'ola pare ma igi nanu. Kadok ewotho i ot pa Mungu asu, eii ninen calu dhanu pa Mungu, ento awanya ma rac mi ng'om ubimo wiye. Der pa Mungu doko nok yor i cwinye. Kawono ebedo ku pidoic aryo. Cwinye bepyemo i kind pidoic aryone. Emaku mondo i lembe mi ng'om, ento ku dhoge re ewacu ya emaru Mungu. Cero ma col ma i cwinye benyutho nia mudho yutho ng'eyong'ec pare. Yen m'athara udoko pek ire.

Yiyoyic pare maku bedoko nok, dong' eweco ngo ku Mungu i yo mi rwo. Epido ngo pi cwinye m'udoko ng'ic, man ebemiyo kaka ni wonabali m'ubedo ceng'ni cwinye kara emond i iye. Emaru ribre ku ju m'i ng'om sagu niribiri ku juyic mandha.

Tipo mi kuhaya, calu winyo ma jakuhaya, beyenyo kamondo. Nyo jayic maeno wiye wil nia eboth ni kum bero. Pi lembe nini edoko Jakristo ma jakuhaya. Ava madhu kong'o betime dit. Nyo juwagi mi ng'om gibemulo iye ya emadh wal acel kende, kadi giwacu ire kumae: "Maeni en e kong'o ma lake mbe, en e calu pi." Epoy ungo nia madhu wal acel kende mi kong'o ma lake mbe binyayu ava i cwinye cil m'ebicwale ko nimadhu kong'o ma mero jo. Dhaku m'ubenyobo kong'o ni nico pare karacelo ku jurimbe, ewacu ya etimo rac ungo kum emadhu ngo. Maku eng'ey nia en nini ebetelo wi jumange nimadhu, kum kumeno tipo mi mer kong'o ubewondo en bende. Pidoic mi kum kud awanyane de besayu yo nibimo i cwiny Jakristo. Nyo wec mir acidi, neno ayi mi lewic, niribri ku ju ma pigi rac dit apila, nitimo tarwang', nimyelo myel, man tuko ma ber ungo, ceke gidoko ber i wang'e. Ewinjo abidhe pa wonabali m'uwacu nia maeni kura dhanu. Nitimo kumeno man nidubo wang' acel kende e rac ungo.

Maeni en e lembe ma wonabali wonde ko, ento tipo m'ucido gidaru nwang'u yo ma gimondo ko i cwinye m'ubedo leng', man gidwoke ni kabedo migi. Mungu becimowa matek kumae: "Dong' iring awanya ma rac mir ayada." 2 Timoteo 2:22. Mungu yenyo ngo ya wamira ni dubo, kadok en e dubo ma nenedi. Ring ba Yesu Jalar, ma Won aloci.

I ayi maeni ng'atu m'ubecobo cwiny ku pala benyutho jucac ku judegi mi juyic. Gicobo cwinye ku wec ma rac mi dhoggi, ku cac ma gicaye ko. Emaku lwooro dhanu ma sagu lwooro Mungu. Ni kum elwooro gin ma dhanu biyero, man gin ma gibitimo edoko bong' mi dhanu, emaku weko Mungu. Ka lembe ma tek

uwok m'usendo cwinye ng'eycwiny maku nege calu ma con. Nyeko ma ayi thwol unyutho wok ka waneno lembe mi juwadwa bedo ber ma sagu lembe mwa. Ebimondo nyalwe tek wayiyo ire. Ebimiyo kaka ni adegi ku kuhaya. En e lembe ma tek ungo niweko yo ni awanya mi lonyo mond i cwinywa. Tek wagwoko lembang'ola pa Rwoth mwa Yesu Kristo ngo, m'ewacu kumae: "Wukur, wurwo de, kara kud wupodh i abidhe." Matayo 26:41. Piopio Jok unwang'u kakare i cwinywa.

"Wek ng'atu m'uparu ya ecungo ebed ku wang'e emaru podho." 1 Jukorinto 10:12. "Wurony jamlwiny pa Mungu ceke kara wucopo cungo ko ni ryeko pa wonabali." Juefeso 6:11 Wusom versi 12-18 bende.

7. AYI MIR ABIRO



Ayi maeni beponjowa pi cwiny ng'atu m'uweko yo pa Mungu. Eneno der pa Mungu wang' acel, ebilo giramiya mi polo, ento ma cen elokre. Juebrania 6:4-6. Ng'atu m'udwoko cwinye tek calu kidi, m'ekwero niwinjo dwand Mungu, lembe pare bidoko rac apila, kadok eponjo dit ku tego pare gire nibedo cu.

Yesu nyutho lembe pi ng'atu m'uweko yo pa Mungu kan ewacu kumae: "Ka tipo m'ucido wok woko kud i ng'atu moko, ecidho, ewire ka ma pi mbe i iye nisayu ka yom. Tek enwang'u kabedo moko ngo, ewacu kumae: "Abidok i ot para m'aay i iye.) "E kan edok, enwang'u i ot maeno bedo ayweya, aruka de, elund ewok woko man egamu tipo mange abiro ma reco ma sage, e gimondo man gibedo keca. I kajikne bedo pa ng'atuca doko rac ma sagu makwong'a." Luka 11:24-26. "Gwok unang'u ng'ok m'eng'ogo man kul ma judaru lwoko kume dok kendo ninyothre i unzabu." 2 Petro 2:22. Versi maeni benyutho ngbeng' lembe mi cwiny ng'atu m'uweko yo pa Mungu man pa jadubo m'ukwero tuco dubo pare. Dubo kud awondi pare ceke dwogo nibimo cwinye.

Cil wang'e de benyutho maram cwinye bedo ko. Der giribri ngo ku mudho. Cwiny copo bedo ni ot pa Mungu ku pa Jok de ngo. Biblia bedo auma, esome ngo, ento Mungu bekuro nineno tek nyo nicone kadi dhakune copo poy calu wod m'uweko won. "Eyenyo ya ecam piny ma kul gibegicamu, ento ng'atu moko mbe m'umiyo ire gin moko. Tok cen enwang'u ryeko, ewacu yor i iye kumae: "Abiay, abidok ba vwa, abiwacu ire kumae: Vwa, adubo i wang' Mungu man i weng'i bende. Aromo ngo ya ilwong'a wodi." Luka 15:16-19. Kum eloko cwinye andha man can unege pi dubo pare, won ujole.

Ng'atu maeni mbe kud ava niloko cwinye kadi nituco dubo pare ni Yesu, kara ewek dubo pare ceke. Dubo yutho pidoic pare, ewinjo Mungu kendo ngo. Ebedo ku ithe mi winjo, ento ecopo winjo ngo. Ebedo ku wang'e, ento ecopo neno longoro ma lyeng' ungo m'ubekure kara epodh i iye. Embe ku lewic, cwinye dyeng' ungo pi dubo pare. Kum kumeno etimo kwond dubo ma tung' tung' ka ma ngbeng'. Jok udaru bimo cwinye. Ejany i cwinye calu ubimo. Nyo fodi ebeponjo ya ebed ng'atu ma cu i wang' dhanu. Ebedo kud ayi mi lubo Mungu, ento e calu ju ma Yesu weco kugi. "Can i wiwu juponji mi Cik ku Jufarisayo, wu weg ambili! Wu calu lyel ma jufuyo kumgi ku nunu, ma ginen leng' yo woko, ento igi pong' ku cogo dhanu man giki mange m'utop." Matayo 23:27.

Won ndra daru maku kaka Tipo mi lemandha. Yedi ceke ku dubo ceke gibedo ku jogi man ku tipo m'ucido. Gidaru bimo cwinye. Eyenyo egonyre kud i twic migi, ento ecopre ngo kum en e jamiru migi. Enwang'u ya lembe bedo andha calu ma Mungu yero ku dhu jukwenda Paul giku Petro. "Ng'atu ma tek uturo Cik pa Musa junege umbe kisa, tek jumulembe aryo kadi adek gituco nia edubo andha. Ka kumeno ke girang'o ma biwok kum ng'atu ma cayu Wod Mungu, ma kwanu rimb lembariba pa Mungu ma judwoke ko leng' ni gin ma swa, man ma cayu Tipo mi bero? Dong' wupar maram pokolembe pare bibedo ko rac ma sagu dit." Juebrania 10:28-29; 2 Petro 2:1-14.

Tek ayi maeni benyutho maram cwinyi bedo ko, ywak ba Mungu ku cwinyi ceke. Eyenyo ewek dubo peri, elonyi ni dubo ceke tek ibino ku lokocwiny mandha. Ecopo twiyo wonabali ku tic pare ceke, niwodhogi woko kud i cwinyi tek iyiyi ya etim kumeno. Dong' ibin calu ng'atu ma won joy m'ubino ba Yesu, ekwaye kumae: "Tek iyenyo, icopo dwoka leng'." Yesu dwoko lembe ire kumae: "Ayenyo, kumi dok leng'." Marko 1:40-41. Ento tek idwoko cwinyi nwang' asu, m'imaru mudho ma sagu der, genogen umbe kadi kony de mbe, kum ifoyo tho kaka kwo. "Kum sukuliya mi dubo en e tho." Jurumi 6:23.

8. AYI MIR ABORA

Kajik pa ng'atu m'ukwero nijolo Yesu Kristo ni Jalarne bedo can kwa. Nyo elar ewacu ya ebiloko cwinye ceng' mange. Kawono eni ceng'ni tho. Kume beremo masagu, cwinye pong' ku lworu mi tho.

Tho wok i wiye mbwang', i nindo m'egenyo ngo, kadi m'eyenyo de ngo. Anyong'a mi dubo daru thum man ebepoy pi sukuliya mi dubo m'ebimaku yo ng'ey tho. Masendi mi nam mac unyayu lworu i cwinye. Kadok eyenyo erwo, ecopre ngo ire kum ekwero mer pa Mungu nindo ceke mi kwo pare. Jurimbe mi ng'om gilworo nicungo i ng'et kavuto pare. Kawono wec migi ma iye nanu copo juke ngo. Lonyo m'ecoko ku yo ma rac copo bodhe ngo, kadi copo konyo remokum pare de ngo, eryemo tho de ngo. Ebeponjo niparu pi Lembe pa Mungu, ento wonabali becero ire yoje ndu.

Lembe ceke mi ng'om m'ebedeyenyo enwang'u gidoko ire ni ng'yero. Cil jukony pare ma gi juponji mi ndra gicopo konye ngo. Emaku ng'eyo ya "podho i cing' Mungu ma kwo en e gin mi lworu." Juebrania 10:31.

Yang' epido pi yiko lembe pare ba Mungu, kadi i nindo mi tho pare, ento enwang'u nindone daru kadhu. Udul dhanu dupa githo rek, ma ginwang'u saa ngo ma giyik ko lembe migi. Ni kum lembe nini Mungu wacu ya maku wayenye i nindo m'enwang're i iye. Isaya 55:6.

Jadubo maeni m'ukwero mer ku bero pa Mungu i nindo pare ceke m'ebedo ko i ng'om, ubetho kawono. Nindo mi winjo juk ku lembe mi both pa Mungu daru kadhu ire. Kawono ebiwinjo ndhu dwand japok lembe pare m'uwacu kumae: "Ubimo bilund wacu ni ju m'ubedo yo ku cinge ma yor acam kumae: "Wuay cen kud i vuta, wu ju ma Mungu kwong'owu, wucidh i mac ma rondo ku rondo, ma juyiko ni Jok ku jumalaika pare." Matayo 25:41.




“Calu ekethre ni dhanu ya githo wang’ acel pil, man yo ng’ey maeni pokolemba pa Mungu.” Juebrania 9:27.

9. AYI MIR ABUNG’WEN

Nindo moko muloic usendo dhanu pa Mungu dit karacelo kud abidhe pa Jok. Kadok abidhe ma tung’ tung’ uwok Jakristone moko ki wi yiyoyic pare cil i kajikne. I giki ceke eloyo ni kum Kristo Yesu. Eokre kun ku kun ungo, ento eneno ba Yesu m’e jathek ku jadar mi yiyoyic mwa. “Kum wabedo kud udul jumulemba maeni m’utyekowa, dong’ wawany ter ma pek ceke, ku dubo m’unurowa, man waringu ng’wec i kwaya ma juketho i wang’wa, ku twiyocwiny.” Juebrania 12:1-2.

Jok karacelo kud udul tipo m’ucido gityeko cwiny jayyic, giponjo kwe ya giketh nyathin pa Mungu kyer. Kuhaya, ava lonyo, tipo mitarwang’ ku mange de dupa gisayu yo nimondo i cwinye. I kaka ng’u waneno kana, kum wang’ udul dubo bino ba dhanu ku kwonde ma tung’ tung’. Ento jayic m’ukiyo eng’iyo dubo kadok ebino kud ayi lembe ma ber, kadi ayi malaika mi der. Lembe pa Mungu ku Tipo ma Leng’ ubetelo



wiye i lembe mandha ceke. Ceng'ni ku yedi icopo neno ng'atu acel m'ubemyelo nyel. Emaku wal mi kong'o i cinge m'ebidho ko Jakristo kud anyong'a mi ng'om. Ento ecopo bolo jayic ungo m'umire zo ni Mungu kum edaru tho ku Kristo ni awanya mi ng'om. Ng'atu mange m'unen i ayi, ubecobo cwiny jayicne ku pala. Tang'dhok, cac, yero nying' man cimocim ma rac, giki ma wadi maeni judegi pa Mungu gitimo ko nisendo jayic. Wang' udul ju ma gilwong'ri ya gi dhanu pa Mungu gisendo juyic ku giki ma kumeni bende. Wec mi dhanu dyeng'o cwiny jayic ungo kum epido pi gin ma Mungu yero re. Epoy pi lembe ma Yesu wacu kumae: "Mugisa iwu ka dhanu becayuwu, gibenyayu ragedo i kumwu, man gibeyero giki ma reco ma tung' tung' i kumwu ku ndra, kum wu julubna. Anyong'a ku mutoro negwu kum sukuliya ma dit ubekurowu i polo, kum gilar ginyayu ragedo kumeno i kum jubila m'utelo yo i weng'wu." Matayo 5:11-12.

Yeny mi kum karacelo ku yeny pa Jok gibeponjo matek nikoyo Jakristo ku mer pa Mungu. Ento ecopo wacu kud anyong'a man ku genogen, calu jakwenda Paul: "Ng'a ke ma copo

koyowa ku mer pa Kristo? Masendi, ndiba, ragedo, ndru, can kendi, ruwva, kadi tho? Igiki maeni ceke wasagu weg avoci ni kum en m'amaruwa!" Jurumi 8:35,37.

Kum edaru ronyo jamtho pa Mungu kpo, jayic copo cungo kri ceng' maeni ma rac. Ecopo voyo abidhe ceke ni kum Yesu Kristo. Yesu voyo masendi kud abidhe ceke kara ni kume wan bende wacopo loyo man wacopo nwang'u jamker mi wic mi dwong'.

CERO

Cero mi pidoic pare e leng' man eberyeny. Cwiny jayic maeni pong' ku yiyoyic man Tipo ma Leng' ubedo i iye. Malaika pa Mungu becikunyutho ire lembang'ola ma ber pa Mungu m'eng'olo ni ju ma gibilojo ni kum yiyoyic, nitundo cil i kajik.

"Ng'atu ma ithe nuti wek ewinj lembe ma Tipo beyero ni kanisa. Ni ng'atu m'uloyo abimiyo ire copo mi camu nying yen mi kwo ma nuti i podho pa Mungu." Lembanyutha 2:7,11,17,26; 3:5,12,21.

USAU MI SENTE

Usau mi sente ma dhoge bedo ayaba benyutho nia ethyero lonyo pare ni Mungu. Enyotho lonyo pare ngo ku lembe mi ng'om, ento ekonyo ko jucan piny. Emiyo apaje mi giki ceke m'ebedo ko ni Mungu.

CAM MA CU

Maeni nyutho ya woth pare bedo leng' kum ekwere gire. Ecidre ngo ku madhu giramadha ma mero jo, nicamu rimo, lim ma judeyo adeya, kadi cam mange ma leng' ungo. Enyotho lim pare swa ngo, kadi ecido kume ngo ma en e Hekalu pa Mungu, ku ywayu taba, madhu njay, kadi ith uboko mange. Ento ecamu cam ma ber, ma leng', ma konyo kum. Cwinye doko ni ot mi rwo, man ewotho ceng' ceke i ot pa Mungu kadok i nindo mi koth kadi i nindo mi ceng'. Emaru nirwo, ku juot pare, yor i cwinye, man ku dhanu pa Mungu. Eng'eyo nia Jakristo copo bedo ber ki ngo tek ebeweco ku Mungu ngo i rwo.

BUKU M'UBEDO AYABA

Biblia bedo ayaba ni jayic, kum Tipo pa Mungu nyutho ire ka the lembene ceng' ceke. I iye enwang'u ryeko, tego, kwo, der, man lonyo ma yere ngo. Edoko der ni yo pare, man palamularu m'eloyo ko jadegine. En e kwen mi cwinye ma konyo ng'eyong'ec pare ku ba ceng'. En e pi ma nego ryew pi ire, elwoko cwinye thirithiri, en e kyew m'enenre ko en gire.

Emaru dit nipido pi yen m'athara pa Yesu kum eng'eyo ya tek Yesu tho kor yen m'athara ngo both umbe. Kum eng'eyo ya edaru cer ni kwo ma nyen karacelo ku Kristo, dong' ebeyenyo gin ma ni malu, gin m'unen ungo. Eyikre nirombo ku Mungu. En e calu yen ma jupidho dhu kulo mi pi ma cego nyinge dupa. Mer pa Mungu daru romo cwinye mandha, kum kumeno ecopo lworu tho ngo. Zaburi 1:2-3; Yohana 15:5; 1 Yohana 4:18.

10. AYI MIR APAR

Yesu wacu kumae: "An a cer ku kwo de. Ng'atu m'uyiya, kadok etho ebibedo kwo, man ng'atu ma kwo m'uyiya, ebitho tak de ngo." Yohana 11:25-26. "Ng'atu m'uwinjo lembe para, m'uyiyo ng'atu m'uora de, bedo ku kwo ma rondo ku rondo. Jubipoko lembe ngo i wiye, kum edaru kadhu kud i tho emonde i kwo." Yohana 5:24 Som 1 Jukorinto 15:54-57 bende.

Ng'atu m'ubedo ku Mungu, m'uwotho kude de, ebedo ku lworu mi tho ngo. Ka nindo mi tho tundo ecopo cidho kud anyong'a calu Paul ma jakwenda wacu kumae: "E dong' lembe bewira i kind gin aryo maeni, kum ava ay kud i kwo maeni benega kara abed ku Kristo, kum maeni en e lembe ma ber ma sagu dit." Jufilipi 1:23.

Jakristo bedo kud ava dit nineno wang' Yesu m'utho pire kor yen m'athara. Tipo ma Leng' ubepoye pi lembe ma Yesu yero kumae: "Cwinywu kud udyeng'. Wuyi Mungu, wuyi an bende. I pacu pa Vwa udi dupa nuti e acidho niyiko iwu kabedo kuca. Abidwogo kendo nigamuwu i bang'a kara wun bende wubed kaka m'ani i iye." Yohana 14:1-3. "Gin ma fodi juneno ngo kadi juwinjo pire ngo, man fodi dhanu paru pire de ngo. En e giki ceke ma Mungu yiko ni ju m'umare." 1 Jukorinto 2:9. Dhok moko mbe i ng'om m'uromo ninyutho dwong' kud anyong'a mi polo ma Mungu daru yiko ni dhanu m'ulubo ng'ey Yesu Kristo keni i ng'om.

I ayi maeni waneno ngo cogo ng'atu m'utho. Ento waneno malaika ma jakwenda pa Mungu. Malaika pa Mungu bekuro kara egam tipo pa ng'atu ma pwe, edwoke ba Mungu. Kwo ribre ngo kendo ku kum, kum kwo becidho malu i kor Yesu, ma jayic umaru, m'ebedo ni kume i ng'om. Udul dupa gibekure nijole kud anyong'a i wang' Mungu, ka ma Rwoth pare biwacu ire kumae: "Itimo dre, i jatic ma ber, mandha de. Ibedo mandha i gin ma nyanok, abikethi wi giki dupa. Mond i mutoro para." Matayo 25:21. Jok umbe ku tego kendo i wiye, kum "Tho mi ju ma leng' pare, pire tek i wang' Mungu." Zaburi 116:15. "Musiga ni ju ma gibitho i Yesu niay i nindo ma kawono. Tipo ma Leng' pa Rwoth Mungu wacu bende nia gibiyom, man gibinwang'u sukuliya mi tic ma gitimo." Lembanyutha 14:13.



In i ng'atu m'ibesomo buku maeni m'ubenyutho cwiny dhanu, maku ya Mungu konyi kara ilok cwinyi ba Yesu m'umeri. Kum ebewacu kumae: "Woda, kadi nyara, mi cwinyi ira." Lemryeko 23:26. Lok cwinyi ba Yesu man ebimiyo iri cwiny ma nyen, ebiketho Tipo pare i ii. Kud iyi cwiny mir abombi wondi, m'ilub ko awanyane, kum "Ng'atu ma genre gire en e jakasegu, ento ng'atu ma gwoko woth pare ku ryeko, ebiboth." Lemryeko 28:26. Wek dubo peri, mok kum lembe ma pwe, kum "sukuliya mi dubo en e tho, ento giramiya ma Mungu miyo mananu re en e kwo ma rondo ku rondo ni kum Kristo Yesu ma Rwoth mwa." Jurumi 6:23.

Wun ma wudaru miyo kwo mu ni Mungu, dong' wutwiru wi lembe mandha ku yiyoyic man ku mer ma ni i Yesu Kristo. Wuyi karacelo ku Paul, lembe m'eyero kumae: "Kum ang'eyo ng'atu m'ayiyo, man ang'eyo andhandha nia ecopo gwoko gin m'aketho i kore cil i ceng' maeca." 2 Timoteo 1:12. Dong i yiyoyic ma leng'. Rwo i Tipo ma Leng'. Gwokri giri i mer pa Mungu, m'ineno ko ba Yesu ma en e yo, ku lemandha, ku kwo de. Rwoth Yesu Kristo mwa bidwogo pio nijolo jupare. En e Ubimo mir ubimo, man Rwoth mi rwodhi.

"Ire, m'ecopo kurowu kara kud wukyer, m'ecopo ketho wucung i wang' dwong' pare ma lembe mbe i wiwu i mutoro ma dit, ni Mungu m'e kende ma Jalar mwa, ni kum Yesu Kristo ma Rwoth mwa, yung, ku dwong', ku kero man tego bed ire ugamre por con, kawono de man cil rondo ku rondo." Yuda 24-25.

Wer 201: *Kal pa Rwoth cido ngo kum e leng',
Man ke dubo ku tho bende mbe.
Yesu yiko kabedo ma ber,
Ebicokowa ndhu ceng' mange.
Ka wanyiko dhu wath kuca bo
Wabigoyo muzira wi Rwoth,
Kwiyocwiny pare sagu mi ng'om,
Man kakeca emiyowa yom.
K: Ng'ombe leng':
Ng'om ma ber mire ma nja ku nja.*

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de www.angp-hb.co.za

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, à l'école du dimanche ou lors de réunions de plein air. Soyez aimable de nous contacter pour assurer les derniers prix en cours du tableau.

As 10 imagens do coração, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coração podem ser obtidos com características Europeias e Africanas e podem ser usados em conjunção com o mesmo livro em classes de ensino bíblico, evangelização ou ao ar livre. Agradecemos que nos contacte-se para confirmação do último preço dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations

Une Mission de litterature evangelique financee de dons

Missao de literatura Evangelica financiada por donativos

(Reg. No. 1961/001798/08)

DOWNLOAD BOOKLETS: www.angp-hb.co.za

ORDER FREE LITERATURE: info@angp.co.za

page 21 of 24 pages